

Ս. ԷԶՄԻԱԾՆԻ ՄԱՅՐ ՏԱՃԱՐԻ ՆՈՐՈԳՈՒԹԵԱՆ ՄՐՑԱՆԱԿԻ ԾՐԱԳԻՐ

Ս. Էջմիածնի Մայր Տաճարի նորոգութեան Յանձնա-
ժողովը յայտարարում է մրցանակ (կոնկուրս)՝ կազմելու
նորոգութեան նախագծեր այն ծրագրով, որ մշակել է
Թիֆլիսում բաղկացած Մասնաժողովը:

Անկախ երեք հրաւիրուած ճարտարապետներից, որոնց
իւրաքանչիւրին տրւում է 500-ական ռուբլի վարձատրու-
թիւն, հրաւիրւում և թոյլատրւում է մասնակցել մրցանա-
կին նաև բոլոր այլ ճարտարապետներին, թէ տեղական և
թէ այլ քաղաքների:

Յիշեալ կոնկուրսին — մրցանակին մասնակցելու ցան-
կութիւն ունեցող անձինք առաջնորդուելու համար՝ բացի
մրցանակի սոյն պայմաններից՝ ստանում են իսկականից
վիմագրութեամբ հանւած 9 թերթ գծած նկարներ, սա-
ժէնին մի դիւյժ՝ մասշտաբով: Մրցակիցները նորոգութեան
յատակագիծը կազմելիս պէտք է առաջնորդուեն հետևեալ
պարտաւորեցուցիչ պայմաններով.

1. Վերականգնել Տաճարի շրջապատի նախկին ցոկոլը:
(նկարներին կցւում է Տաճարի հետ ցոկոլի լուսանկարը):

2. Թողնել զանգակատունն ամբողջութեամբ առանց
փոփոխութեան:

3. Թողնել անփոփոխ կողքերի երկու մուտքը:

4. Պահպանել անփոփոխ կողքերի երկու ապսիդների
և գլխաւոր սեղանի երեք գմբէթը, իսկ կենդրոնի գմբէթի
նկատմամբ թոյլատրւում է փոփոխել միայն նրա տանիքի
թեքութիւնը:

5. Ոչնչացնել կողքի գմբէթների շուրջը իբրև ամրոց
շինած շրջապարիսպը և վերականգնել ըստ հնարաւորու-
թեան պսակող կարնիզները և ֆրոնտոնն իրենց նախկին
դիրքով, որոնց մնացորդները ցոյց են տրւած գծած յա-
տակագծի վրայ:

6. Պէտք է վերցնել արևելեան կողմի շինութիւնը

(Թանգարանը), որովհետև անհամապատասխան է տաճարի ընդհանուր ձևին և ոճին: (Թանգարանի սահմանները յատակագծի վրայ նշանակւած են № № գծերով):

7. Ի նկատի առնելով, որ գլխաւոր սեղանի երկու կողմի հին խորանները չեն կարող լիովին բաւարարել հանգիստւոր օրերի և Տաճարի կարիքների ներկայ պահանջներին, ուստի անհրաժեշտ է ծրագրել այդ նպատակի համար հին խորանին կից մի նոր լրացուցիչ շինութիւն արևելեան կողմից, Տաճարի ոճով, որ բաղկացած լինի երեք բաժանմունքից, աւանդատուն 20 քառակուսի սաժէն տարածութեամբ և մասանց խորան՝ 5 քառակուսի սաժէն:

8. Հիւսիսային խորանը պէտք է ունենայ Տաճարի յատակից 7 աստիճանի բարձրութիւն, իւրաքանչիւր աստիճանը 5 վերշուկ: Հարաւային սեղանի աստիճանների թիւը և բարձրութիւնը մնում են անփոփոխ:

9. Յատակագիծը պէտք է ունենայ 4 ֆասադների պատկեր, լայնութեան ու երկարութեան կտրուածքներ, նոր յաւելեալ շինութեան կտրուածք և լրացուցիչ պարզաբանող նկարներ (чертежъ), բոլորը պէտք է գծւած լինեն սաժէնին մի դիւյիմ՝ մասշտաբով: Պարզաբանող գրաւոր բացատրութիւններ պարտաւորիչ չեն, բայց ցանկալի են:

10. Ս. Էջմիածնի վերանորոգութեան յանձնաժողովը համեմատաբար ամենալաւ ծրագրի համար նշանակում է մի պրեմիա 1000 ռուբլի վարձատրութեամբ, սակայն հրաւիրւած ճարտարապետները, պրեմիայի արժանանալու գէպքում, կըստանան միայն 500 ռուբլի:

Բացի դրանից ժիւրիին վերապահւում է իրաւունք յանձնարարել Էջմիածնի յանձնաժողովին ձեռք բերելու պրեմիայի չարժանացած ծրագիրներից մէկը 500 ռուբլի վարձատրութեամբ:

11. Պրեմիայի ստացումը իրաւունք չի տալիս հեղինակին աշխատանքի վրայ հսկելու, այլ հսկողի ընտրութիւնը ամբողջապէս կախւած է Ս. Էջմիածնի Տաճարի վերանորոգութեան յանձնաժողովի և Թիֆլիսի մասնախմբի փոխադարձ համաձայնութիւնից:

12. Յատակագիծը պէտք է ներկայացնեն գրպանների մէջ և ոչ ծալած դիրքով, սրանց կցուած կը լինեն փակ ծրարներ, ուր պէտք է նշանակուած լինեն հեղինակի անունը, հայրանունը և ազգանունը, նոյնպէս և նրա մանրամասն հասցէն:

13. Յատակագծերը ներկայացնելու համար տրուած է հինգ ամիս ժամանակամիջոց կոնկուրսը յայտարարելու օրից հաշուելով, ժամանակամիջոցը լրացած օրուայ ժամը 12-ից յետոյ տեղական ճարտարապետներից այլևս չէ ընդունուած յատակագիծ, իսկ այլ քաղաքներից պոստին յանձնելու վերջնական ժամանակամիջոցը համարուած է նոյն օրը (այսինքն փետր. 1) և իբրև ապացոյց պէտք է այդ օրուայ թուով պոստից ստացած ապահովագիրը առանձին նամակով ուղարկեն:

14. Յատակագիծը պէտք է ուղղեն հետևեալ հասցեով. — Թիֆլիս, Էջմիածնի Տաճարի նորոգութեան յանձնաժողովին, գեղեցիկ արևեստները հովանաւորող կովկասեան ընկերութեան, Դաւիթովսկայա փողոց № 2:

15. Այն յատակագծերը, որոնք համապատասխան չեն լինիլ կոնկուրսի վերոյիշեալ պայմաններից որ և է մէկին կամ նշանակեալ ժամանակին չեն ներկայացուի, բոլորովի չեն ենթարկուիլ քննութեան:

16. Յատակագիծը Թիֆլիսում կը դրուի ի տես հասարակութեան միայն պրէմիայի արժանանալուց յետոյ:

17. Մրցանակաբաշխութեան որոշումից յետոյ միւս բոլոր յատակագծերը, բացի մրցանակի արժանացածից, գնելու համար յանձնարարուած (եթէ գտնուեն) և երեք ճարտարապետների պատուիրուած յատակագծերը (որոնք բոլորը կազմուած են Էջմիածնի սեփականութիւն) միւսների տէրերը պէտք է յետ վերցնեն ոչ ուշ քան մի ամիս, որից յետոյ չվերցրած յատակագծերը դառնում են Էջմիածնի յանձնաժողովի սեփականութիւն:

18. Կոնկուրսի նախագծի մութ լինելու նկատմամբ ծագած հարցերը պէտք է կոնկուրսը յայտարարելուց ոչ ուշ քան մինչև 20 օրը ուղղեն վերոյիշեալ հասցեով (տես.

14 կէտ), իսկ հարցերին տրւած պատասխանները կը տրւին կովկասեան տեղական թերթերում և Պետերբուրգում հրատարակող «Зодчий» թերթում 2 ամսուայ ընթացքում կոնկուրսը յայտարարուելուց սկսած: Մրցանակի հետեանքի մասին կը հրատարակուի նաև նոյն թերթերում:

19. Ժիւրին հրաւիրուում է Թիֆլիս հետեեալ կազմով.

1) Մեսրոբ եպիսկոպոս, 2) Գարեգին վարդապետ, 3) Բիլ Ֆէլդ, 4) Բաբանով, 5) Տէր Միքէլեան, 6) Րոտինով, 7) Թադէոսեան, 8) Ֆէթվաճեան, և 9) Գրինսկի:

Նորին Սրբութիւնը հաստատեց Ս. Էջմիածնի Տաճարի Վերանորոգութեան մրցանակի այս ծրագիրը Հայրապետական Կոնդակով 1910 թ. Յուլ. 31, թիւ. 1775:

Դիւանապետ ԲԱԳԻՍՏ ՎԱՐԴԱՊԵՏ

